

Ontmoeting 3

Gulda

Kinders beseef dat God die belangrikste is

Teks: 2 Konings 22; Psalm 119:72

Hulpmiddels:

- Ou klere
- Tas / tasse per groep
- Afdrukke van die boekrol
- Sosatiestokkies
- Sandboks
- Afdrukke van die inkleurprent
- Legkaart van Gulda



Welkom

“Pak in”: Leen ou klere by die klerebank. Gooi die klere op 'n hoop en verdeel die kinders in groepies van 3 elk. Elke groep kry 'n beurt om die klere netjies op te vou en in 'n tas te pak. Hulle moet kyk wie dit die vinnigste kan doen. Hou tyd om die wenner te bepaal.

Of gee 'n houpie klere en tas vir elke groep en kyk wie kan hulle tas die vinnigste netjies inpak.

Ekstra: Plaas 'n “skat” in een van die hopies of sit ongemerk 'n skat tussen die klere vir die laaste groep by opsie 1. Die skat is 'n boekrol waarin Psalm 119:72 staan.



Wyding

Reël vooraf met 'n leier of leidster (of kry 'n vriendin wat bereid sal wees om die dag na die ontmoeting te kom) dat sy, terwyl die kinders speel, eenkant gaan “wegkruip”. Sy moet vir die kinders bid daar waar sy wegkruip.

Sake om voor te bid:

- bid dat die kinders getrou sal bly aan die Here;
- bid vir kinders se eksamens;
- bid vir kinders wat 'n ouer of grootouer verloor het;
- bid vir kinders wat in 'n huis woon waar die ouers nie vir Jesus ken nie;
- bid dat die kinders die boodskap vandag sal verstaan.

Vra nou: “Waar is Tannie _____?”

Stuur kinders om haar te gaan haal. Sy kan dan kom en vir die kinders vertel wat sy vir hulle gebid het. Sy kan nou vir die groep 'n gebed doen.

Stilword-ritueel: Laat die kinders die volgende verse agter die leier aan sê: “Die Here is my herder, ek kom niks kort nie. Hy laat my rus in groen weivelde. Hy bring my by waters waar daar vrede is. Hy gee my nuwe krag. Hy lei my op die regte paaie tot die eer van sy Naam.” (Ps 23:1-3)



Woord

Vandag se vreemde vrou het ook h vreemde werk, net soos Debora. Kan julle onthou wat Debora se werk was? Ja, sy was h profetes. Vandag se vreemde vrou is ook h profetes. Sy is ook nie soos al die ander mense om haar nie. *(Speel die verhaal in die sandboks.)*

Dink julle mens kan van God vergeet?

Daar was eendag 'n vrou wat tussen mense moes woon wat van God vergeet het. Haar naam was Gulda. Sy het nog tot God gebid, maar die meeste mense was net geïnteresseerd in afgode. Die volk van die Here het van God vergeet, hulle het van sy wet vergeet en hulle het vergeet wat Hy gedoen en beloof het. Hulle het ook God se waarskuwings vergeet. Dit was vir hulle asof God glad nie bestaan het nie. Die tempel was stukkend, vuil, deurmekaar en niemand het omgee nie. Tog was daar hier en daar iemand wat omgee het... soos Gulda.

Iemand anders wat ook omgee het, was Koning Josia. Wat spesiaal van hom was, was dat hy maar net 8 jaar oud was toe hy koning geword het! Hy het gedoen wat reg was in die oë van die Here. Op 'n dag het hy beveel dat die tempel herstel moes word. Hy het betroubare manne aangestel om te sorg dat die tempel herstel word. Hulle het begin werk. Daar kry hulle toe die wetboek van die Here. Hulle neem dit na Koning Josia toe. Toe hulle dit vir hom lees, was hy baie ontsteld. Hy het sy klere geskeur. “Ons het raad nodig. Ons moet hoor wat die Here sê. Gaan kry vir ons 'n antwoord,” het die koning gesê. In daardie tyd het mense hul klere geskeur wanneer hulle ontsteld was.

Sy leiers gaan toe na Gulda toe. Hulle het geweet sy was 'n profetes. *(Verwys na die betekenis van 'n profetes.)* “Ons het die wetboek van God in die tempel gekry en vir die koning gelees. Hy wil weet wat ons nou moet doen.”

Gulda antwoord: “So sê die Here: Sê vir hom die Here sê Hy gaan beslis die mense straf. Hier kom groot moeilikheid. Hulle het God uitgetart met hulle vieslike afgode en al die lelike dinge wat hulle gedoen het. Maar sê vir die koning die Here het gesien hoe hartseer hy oor al hierdie dinge is en sal die straf terughou totdat hy nie meer lewe nie. Hy sal nie hoef te sien hoe God die volk straf nie.”

Die boodskappers gaan terug na die koning en doen verslag: “Die profetes sê God gaan die volk straf oor al die vreeslike goed wat hulle gedoen het, maar eers nadat u, koning Josia, nie meer daar is nie. God het gesien hoe hartseer u is en sal u die swaarkry spaar.”

Koning Josia sê toe: “Kry al die mense, groot en klein, bymekaar by die tempel.”

Die koning het voor almal gaan staan. *(Laat die koning nou met al die kinders praat.)* “Ek beloof om alles te doen wat die Here vra. Ek sal God gehoorsaam met my hele hart en siel solank ek leef. Wat sê julle?”

Die hele volk het saamgestem en belowe om dit ook te doen. Daarna het hulle gegaan en begin om die afgode af te breek. Die wet van die Here was nou vir hulle belangriker as al die skatte van die afgode. *Lees Psalm 119:72.* In vandag se tyd dien mense nie meer dieselfde soort afgod soos in die Bybelse tyd nie. Maar ons moet weet dat enigiets wat vir jou belangriker is as God, h afgod kan wees.

Die kinders kry tyd om oor die verhaal te dink:

1. Ek wonder wat was vir jou mooi in die verhaal.
2. Ek wonder hoe het Gulda gevoel toe sy vir die koning moes sê dat God die mense gaan straf.
3. Ek wonder wie sou jy in die verhaal wou wees.
4. Ek wonder watter soort afgode is daar nog vandag.
5. Ek wonder wat in jou lewe doen jy om God eerste te sit.



Werskaf

- Maak boekrolle soos die een wat tussen die klere gevind is (A4-papier aan weerskante opgedraai aan sosatiestokkies, of tandestokkies).
- Inkleurprent / legkaart van Gulda met die boekrol.
- Speel weer die verhaal in die sandboks uit.

Sluit af met die seënbede

Die kinders sit of staan in 'n sirkel. Hulle hou hul hande uitgestrek na die kante toe met albei palms na bo. Elkeen se regterhand se palm is bo die ander kind se linkerhand se palm. Laat hulle oefen om 'n seënwens aan te gee: Iemand begin om hul regterhand oor te beweeg na links en dan liggies in sy maat aan die linkerkant se hand te tik. Daardie maat doen dan dieselfde met sy regterhand na die maat aan sy linkerkant se hand toe. Stuur so die bede aan in die rondte. Sodra die kinders dit regkry, sê almal die seënbede saam terwyl hulle dit in die rondte “stuur”:


Die Here is **voor** jou om jou pad gelyk te maak;


Die Here is **agter** jou om jou teen slegte dinge te beskerm;

Die Here is **langs** jou om jou in sy arms toe te vou;

Die Here is **onder** jou om jou te dra as jy mag val;

Die Here is **bokant** jou om jou te sien; En die Here is **binne** jou om jou te lei met sy Heilige Gees.





Psalm 119:72: U wet is vir my kosbaarder

as 'n oorvloed van goud en silwer.